


# ***IlanngussaƧ F***



INATSIARTUT

## Inuussutissarsiornermut Nukissiuuteqarnermullu Naalakkersuisoq

Ulloq: 20. november 2018

J.nr.: 01.25.01/18EM-LABU-7

**Aningaasaqarnermut Akileraartarnermullu Ataatsimiititaliamit pingasunnigornermi ulloq 21. november 2018, nal. 16.00-17.00 ataatsimiittarfik Erling Høeghimi siunersiorneqarnissamat aggeqqusissut.**

2019-imi aningaasanut inatsisissatut siunnersuut pillugu (UKA 2018/7).

Inatsisartut suleriaasianni § 19 naapertorlugu siunersiorneqarnissamat Inuussutissarsiornermut Nukissiuuteqarnermullu Naalakkersuisoq Aningaasaqarnermut Akileraartarnermullu Ataatsimiititaliamit matumuuna aggersarneqarpoq.

### **Aningaasaqarnermut Akileraartarnermullu Ataatsimiititaliap oqaaseqaatai apeqquataalu:**

Siunnersuutip aappassaaneernejarneranut malitseqartitsissutitut apeqqutit matuma kingulia-niittut Naalakkersuisunit akineqarnissaat Aningaasaqarnermut Akileraartarnermullu Ataatsimiititaliamit kissaatigineqarpoq.

**Apeqquummi siullermi pineqarput** konto pingaarneq 64.10.25, uulia gasilu pillugit perius-sissaq, aammalu suliniutinik siumut sammisunik aallarnisaanissamik pilersaarutit, Naalakkersuisut naapertorlugit kulbrintinut (uulia gasilu) tunngasunut aningaasaleerusussuse-qalersitseqqissinnaasut. Suliassaq taanna Inatsisartunit assut aklerlerineqartoq ataatsimiititaliamit paasineqarpoq. Taamaattumillu suliassami pissutsit arlallit paasinarsisinneqarnissaat ataatsimiititaliamit kissaatigineqarpoq.

Immikkoortitat konto pingaarneq matumani pineqartoq naapertorlugu suliniutinut angisuunut naatsorsuussat 2015-imut nunatta karsiata naatsorsuutaanut atatillugu Kukkunersiuinermit Ataatsimiititaliamit apeqqutigineqarput. Ataatsimiititaliaq ima apeqquteqarpoq:

*“Suliniutinut angisuunut, tassungalugu ilanngullugu aluminiumimik suliniummumut atatillugu pisussaaffiusinnaasunik piviusunnortitsinissamat ilimanaatillit eqqarsaatigalugit uninngasuutit pissusivinnut suli naleqquttut naapertuuttutullu suli nalilerneqarnersut nassuiaatigeqqullugu Naalakkersuisut qinnuigineqarput.*

Naalakkersuisut apeqqut ima akivaat:

*“Konto pingaarneq 64.10.25 Suliniutini angisuumi pilersaarutit 2015-imi ukiumi naatsorsuusiorfusup naanerani ataatsimut 58,9 mio. kr.-inik ingerlatsinermit sunniuteqartunik nuussisoqarpoq. Aningaasat ukiut arlallit ingerlaneranni pilersinneqarsimapput, Maniitsumik aluminiumimik suliniut aallaqqaammumut naatsorsuutigineqartutut siuariartorsimanani. 2015 eqqarsaatigalugu immikkoortitat annertuumik qaffanneqarsimangillat.*

*Pilersaarutit nanginneqarnissaanut atatillugu pilersaarummi ataatsimoorluni ineri-saalluni pilersaarummilu suliniutit naammassineqarnissaannut Namminersorlutik Oqartussat aningaasartuutaannut aningaasaliissutit matussutaassusaapput – imaluun-*

*niit erngup nukinganik nukissiorfiup pineqartup periarfissap allamut atorineqarnissaanut.*

*2016-imut aningaasanut inatsimmit takuneqarsinnaavoq kontomi tassani aningaasat atorineqanngitsut kingusinnerpaamik 31.12.2019-mi nunatta karsianut utertinneqarsimassasut. 2017-imut aningaasanut inatsisissamut siunnersuusiornermut atatillugu naalackersuisoqarfimmit kissaatigineqarsimavoq aningaasat atorineqanngitsut nunatta karsianut kingusinnerpaamik utertinneqarnissaat 31.12.2020-mut allanngortinneqassasooq. Tamanna ilaatigut aningaasat immikkoortinneqarsimasut allanit atorineqalersinnagit Alcoamut pisussaaffiit sulluunniit immikkut inatsisitigullu peerneqarsimannissaannik, ilaatigut pisut naapertorlugit nunani tamalaani aningaasaliisartuni erngup nukinganut periarfissamut pineqartumut soqutiginnilersitsiniarlutik Naalackersuisut suliniutaannut atatillugu aamma aningaasat taakku tamakkiisumik ilaannakuusumilluunniit atorineqarnissaannut periarfissap siumoortumik aningaasaliinermi oqartussanit akuerineqarlutik periarfissanik sukkasuumik iluaquteqarnissap anguneqarnissaanik kissaateqarnermik aallaaveqarpoq – taamaalillunilu inuiaqatigiinnut nunattalu karsianut sulisoqarnikkut aningaasaqarnikkullu annertuumik iluanaaruteqarnerit piviusunngortinneqarlutik.*

*Taamaattumik naalackersuisoqarfik isumaqarpoq immikkoortitsinerit pineqartut naapertuuttut erseqqissumillu siunertaqartut.”*

#### **Apeqquut 1:**

Siuliani taaneqartunut Naalackersuisut oqaaseqaateqarnissaat ataatsimiititaliamit kissaatigineqarpoq.

**Apeqquutit aappaanni pineqarpoq** 2017-imi ukiumoortumik nalunaarummi Nunaoilip paasissutissiissutai (qupperneq 6), tassani ima allassimasoqarluni:

*”Ukiut 2007-2017 akornanni 2D atorlugu sajuppillatsitsisarlu misissuinerimi km-rit tusintilikkuutaat katersorneqarsimapput, 3D atorlugu sajuppillatsitsisarlu paasissutissanik katersuineq ingerlanneqarsimavoq – siullerpaamik Kalaallit Nunaata imartaani – kiisalu kin nganerit qaleriiaarneri paasiniaarlugit qillerisoqarsimavoq uuliasiorlunilu qillerinerit arfineq pingasut naammassineqarsimallutik. Annertunerusumik ataatsimut uuliaqarsinnaassusermik nalilersuineq 2007-mili nunarput tamakkerlugu ingerlanneqarsimangilaq. Ukiuni makkunani Kalaallit Nunaanni annikitsumik uuliasiorfusuni – nunarsuarmilu uuliasiorneq ataatsimut isigalugu – pissusissamisoorpoq Kalaallit Nunaata imartaani uuliaqarfusinnaasunik nutaamik nalilersuissalluni, taamatullu ilisimasat paasissutissarpasuillu nutaanerpaat ukiut qulit ingerlaneranni katersorneqarsimasut ilaatillugit.”*

Kultbrintinut tunngatillugu akuersissutini Namminersorlutik Oqartussat peqataaneranni aammalu Kalaallit Nunaanni avataanilu tassunga atatillugu suliassanik isumaginninnissaq Nunaoilip suliassaraa.

#### **Apeqquut 2-1:**

Piujuaannartitsinissamik tunngavilimmik nukissiuuteqarnerup qitiutinneqarneranit uuliamut gasimullu nuunnissamik Naalackersuisoqarfiup kissaateqarneranut suna tunngaviua?

#### **Apeqquut 2-2:**

Piffissami 2014-2018-imi uuliamut tunngasumik ingerlatat aallunneqarnerat pingaannginerusunngortinneqassasooq nunatsinni naalackersuinikkut ingerlatsisunit toqqarneqarsimasooq

aningaasanut inatsimmut ataatsimiititaliap apeqqutaanut tunngatillugu Naalakkersuisut paasissutissiissutigaat. Taava nunami misissuinissamik Naalakkersuisoqarfiup kissaateqarneranut suna tunngaviua, Nunaoilimmi imaani uuliasiorluni misissuineq kissaatigimmagu?

Naalakkersuisumik siunersiuinermi malitseqartitsissutinik apeqquteqartoqartarnissaa naat-sorsuutigineqarsinnaavoq.

-----

Ataatsimiititaliap Naalakkersuisumik siunersiuinerata Naalakkersuisup ataatsimiititaliallu akornanni pingaarnersiulluni tulleriiaarinerit anguniakkallu pillugit naalakkersuinermit tunngasumik oqaloqatigiinnertut sapinngisamik iluseqartinneqartarnissaa ataatsimiititaliamit anguniarneqarpoq. Taamatut oqallinneq ammasumik oqallinnertut sapinngisamik ingerlanneqassaaq.

Kiisalu apeqqutit siuliani allassimasut pillugit allakkiamik kalaallisut danskisullu ataatsimiititaliap Naalakkersuisumik siunersiuineranut atatillugu pissarsisinneqarnissani ataatsimiititaliap kissaatigaa. Allakkiap kingusinnerpaamik ataatsimiititaliap Naalakkersuisumik siunersiuinerata kinguninngua uunga nassiunneqarnissaa qinnutigineqarpoq: [saam@ina.gl](mailto:saam@ina.gl). Allakkiaq ataatsimiititaliap Naalakkersuisumik siunersiuineranut nassarneqarpat atorneqarpallu taassuma nuutinnera ataatsimiititaliap Naalakkersuisumik siunersiuinerata aallartin-nerani ataatsimiititaliap oqalutnaanut ataatsimiititaliallu allattaanut tunniuteqquneqarpoq.

Inussiarnersumik inuulluaqqusillunga

  
Karl Kristian Kruse

Aningaasaqarnermut Akileraartarnermullu Ataatsimiititaliap siulittaasua



## Oqaasissanut allakkiq

### Aningaasaqarnermut Akileraartarnermullu Ataatsimiititaliami pingasunngorneq ulloq 22 november 2018 nal. 16-17 ataatsimiittarfimmi Erling Høegh-imi siunersiuiineq

Siunersiuiinnermut matumunnga aggersaanermit qujanaq, tassani aningaasanut inatsisissatut siunnersuummi kontu pingaarneq 64.10.25 kiisalu apeqqutit allat Kalaallit Nunaanni uuliasiorluni misissuinnermut tunngassuteqartut pillugit apeqqutit arlallit akissuteqarfigissagikka Aningaasaqarnermut Akileraartarnermullu Ataatsimiititaliap kissaatigaa. Ullumi naalakkersuisoqarfimmi pisortaanerup Jørn Skov Nielsen-ip peqatigaanga.

22-11-2018  
Suliap nr. 2018 - 24041

Postboks 1601  
3900 Nuuk  
Tlf. (+299) 34 50 00  
E-mail: isiin@nanoq.gl  
www.naalakkersuisut.gl

Aallarniutigalugu periarfissaq iluatsillugu erseqqissarusuppara, kontumi pingaarnermi 64.10.25-imi aningaasaliissutit atorineqarnissaat siunnersuutigineqartoq taparserneqanngitsoq Naalakkersuisut maluginiarmassuk, tassa imaappoq aningaasaliissutit Nuussuarmi sajuppillatsitsisariluni paasissutissamik katersinissamut allanillu ineritsitsinissamut suliniutinut atorineqassanngitsut.

Siunissami uuliasiornermut gassisornermullu suliaasaqarfimmi suliaqarnissaq allatigut 2019-2023-imut uuliasiornermut gassisornermullu periusissiami pisussami, suliarineqaleruttortumi, nassuiarneqassapput.

#### Apeqquut 1:

Apeqquummi siullermi pineqarput kontu pingaarneq 64.10.25, Uulia Gassilu pillugit periusissiaq, aammalu suliniutinik siumut sammisunik aallarnisaanissamik pilersaarutit, Naalakkersuisut naapertorlugit kulbrintinut (uulia gassilu) tunngasunut aningaasaleerususeqalersitseqqissinnaasut.

Kukkunersiuiinnermut Ataatsimiititaliap 2015-imut nunap karsiata naatsorsuutaasa suliarineqarnerannut atatillugu piumasarisimagaa, Aningaasaqarnermut Akileraartarnermullu Ataatsimiititaliap apeqquteqaammimi innersuussutigaa:

*”Suliniutinut angisuunut, tassungalu ilanngullugu aluminiumimik suliniummumut atatillugu pisussaaffiusinnaasunik piviusunngortitsinissamut ilimanaatillit eqqarsaatigalugit uninngasuutit pissusivinnut suli naleqquttutut naapertuuttutullu suli nalilerneqarnerisut nassuiaatigeqqullugu Naalakkersuisut qinnuigineqarput”.*

Aningaasaqarnermut Akileraartarnermullu Ataatsimiititaliap aammattaq Naalakkersuisut akissutaat innersuussutigaa, tassani ilaatigut allassimalluni:

- Aningaasat ukiut arlallit ingerlaneranni pilersinneqarsimasut, Maniitsumik aluminiumimik suliniut aallaqqaammut naatsorsuutigineqartutut siuariartorsimanani.
- Pilersaarutip nangingneqarnissaanut atatillugu pilersaarummi ataatsimoorluni inerisaalluni pilersaarummilu suliniutit naammassineqarnissaannut Namminersorlutik Oqartussat aningaasartuutaannut aningaasaliissutit matussutaasussaasut – imaluunniit erngup nukinganik nukissiorfiup pineqartup periarfissap allamut atorneqarnissaanut.
- 2016-imut aningaasanut inatsimmit takuneqarsinnaasoq kontomi tassani aningaasat atorneqanngitsut kingusinnerpaamik 31.12.2019-mi nunatta karsianut utertinneqarsimassasut.
- 2017-imut aningaasanut inatsisissamut siunnersuusiornermut atatillugu naalackersuisoqarfimmit kissaatigineqarsimavoq aningaasat atorneqanngitsut nunatta karsianut kingusinnerpaamik utertinneqarnissaat 31.12.2020-mut allanngortinneqassasoq.
- Tamanna ilaatigut aningaasat immikkoortinneqarsimasut allanit atorneqalersinnagit Alcoamut pisussaaffiit suulluunniit immikkut inatsisitigullu peerneqarsimanissaannik, ilaatigut pisut naapertorlugit nunani tamalaani aningaasaliisartuni erngup nukinganut periarfissamut pineqartumut soqutiginnilersitsiniarlutik Naalackersuisut suliniutaannut atatillugu aamma aningaasat taakku tamakkiisumik ilaannakuusumilluunniit atorneqarnissaannut periarfissap siumoortumik aningaasaliinermi oqartussanit akuerineqarlutik periarfissanik sukkasuumik iluaquteqarnissap anguneqarnissaanik kissaateqarnermik aallaaveqartoq – taamaalillunilu inuiaqatigiinnut nunattalu karsianut sulisoqarnikkut aningaasaqarnikkullu annertuumik iluanaaruteqarnerit piviusunngortinneqarlutik.
- Isumaqartoqartoq immikkoortitsinerit pineqartut naapertuuttut erseqqissumillu siunertaqartut.

### **Akissut 1:**

Aningaasaqarnermut Akileraartarnermullu Ataatsimiititaliap apeqquteqaammini Naalackersuisut suliamut aammalu siusinnerusukkut akissuteqaataasimasumut oqaaseqaateqaqquai.

Siullermik tikkuarusuppara aluminiuliorfimmik ineriartortitsinissaq pillugu Alcoa-mut MoU siulleq tunngaviatigut suli atuummat.

2016-imi oktobarimi taamaalilluni MoU-mut siullermut tapiliusseq isumaqatigiissutigineqarpoq. Tapiliussami pineqartumi erngup nukingani periarfissaqarfiusut maannamut alcoa-p suliassanut inniminnigaasut, allanut nittarsaanneqarsinnaalernissaannut periarfissiisoqarpoq.

Taamaattoq naliliisoqarpoq ingerlanneqaqqaartut ingerlanneqarnissaat nalorninarsiartuinnarpassittoq.

Aammattaarli kontumi pingaarnermi 64.10.25-imi aningaasaliissutit ukiut ingerlaneranni annikillisinneqariartuaarsimapput. Kingullermik aningaasaliissutit 2019-imi aningaasanut inatsisissatut siunnersuummi 58 mio. kr. missaanniit 54 mio. kr. missaannut annikillisinneqarput.

Tamanna aamma ukiut ingerlaneranni kontup pingaarnerep qulequtaata allanngortinneqartarneranut tunngaviuvoq. 2015-imi kontup pingaarnerep qulequtaraa "alumiuliorfissaq", tamannalu 2016-imi allanngortinneqarpoq "suliniutit angisuut". 2017-imi qulequtaa allanngorteqqinneqarpoq, maannakkullu 2017-imi taaguuteqalerpoq "suliffissuaqarnikkut suliniutinilu angisuuni pilersaarutit". Kingullermik 2019-mut aningaasanut inatsisissatut siunnersuummi qulequtaa allanngortinneqassasoq siunnersuutigineqarpoq imaalerlugu "uulia gassilu pillugit periusissiaq".

Kontup pingaarnerep 64.10.25-ip taaguutaa aammalu kontumut pingaarnermut missingersuutitut ilanngussaq siunnersuutigineqartoq, ullumikkut alumiuliorfissaaqqaartup piviusunngortinneqarnissaa takorluugaannartut periarfissaalluni pissutsinut naapertuuppoq.

Naalakkersuisut aningaasanut inatsisip 2018-imut tunngasoq suliarinerani nalilersorpaat, Alcoa-mut suliniut piviusunngortinnissaa piviusorpalaarsimaqimmat, illuartitsinissaq pisariaqarunnaarsimasoq.

Tamanna tunngavingalugu, kontu pingaarneq aammattaq konto pingaarneq suliffissuaqarnermut suliniutinullu angisuunut atatillugu aallarnisaanermut suliffissuaqarnermut suliniutinilu angisuuni pilersaarutitut allanut atorneqarsinnaalluni. Allatut oqaatigalugu kontu pingaarneq, siunertanut erngup nukinganut ineriartortitsinernuunngikkaluaq, aamma periarfissaasimalluni.

Oqaatigissallugu aamma pingaarpoq, konto pingaarneq 2,1 mio. Kr. 2018-imi annikillineqarsimammat, aamma aningaasaliissutip annikillinerani piomasqaataasimammat, uani kontumi pingaarnermi isertitaqartoqarnissaa.

**Apeqqutip aappaani – apeqqummut 1-imut atatillugu – pineqarpoq 2017-imi ukiumoortumik nalunaarummi qupperneq 6-imi Nunaoilip paasissutiissiissutai, tassani allassimasoqarluni:**

*”Ukiut 2007-2017 akornanni 2D atorlugu sajuppillatsitsisarluni misissuinerimi km-rit tusintilikkuutaat katersorneqarsimapput, 3D atorlugu sajuppillatsitsisarluni paasissutissanik katersuineq ingerlanneqarsimavoq – siullerpaamik Kalaallit Nunaata imartaani – kiisalu kinnganerit qaleriiaarneri paasiniarlugit qillerisoqarsimavoq uuliasiorlunilu qillerinerit arfineq pingasut naammassineqarsimallutik. Annertunerusumik ataatsimut uuliaqarsinnaassusermik nalilersuineq 2007-mili nunarput tamakkerlugu ingerlanneqarsimannngilaq. Ukiuni makkunani Kalaallit Nunaanni annikitsumik uuliasiorfiusuni – nunarsuarmilu uuliasiorneq ataatsimut isigalugu – pissusissamisoorpoq Kalaallit Nunaata imartaani uuliaqarfusinnaasunik nutaamik nalilersuissalluni, taamatullu ilisimasat paasissutissarpassuillu nutaanerpaat ukiut qulit ingerlaneranni katersorneqarsimasut ilaatillugit.”*

aammattaaq siunersiuinissamut aggersaanermi tikkuarneqarpoq ”Kulbrintinut tunngatillugu akuersissutini Namminersorlutik Oqartussat peqataaneranni aammalu Kalaallit Nunaanni avataanilu tassunga atatillugu suliassanik isumaginninnissaq Nunaoilip suliassaraa”.

**Akissut 2:**

Matuma siuliani allassimasut Naalakkersuisut tungaanniit arlalinnik oqaaseqaateqarnissamik pissutissaqalersitsipput.

Siullermik erseqqissarusuppara, isumalluutinik nalilersuineq taaneqartoq Inuusutissarsiornermut Nukissiuuteqarnermullu Naalakkersuisoqarfiup, GEUS-ip aamma Nunaoil-ip akornanni suleqatigiinnermi ingerlanneqarmat.

Aappaattut, Kalaallit Nunaanni uuliaqarsinnaanera pillugu ilisimasaqarnerulernissamut siuarsaanissamullu suliassaq aallaaviatigut Namminersorlutik Oqartussaniimmat, tamannalu ikummatissiassanut suliassaqarfiup isumagineqarneranut nalinginnaasumik ilaammat. Tamanna aamma pissutigalugu, aatsitassarsiorluni misissuineq pillugu Naalakkersuisut aamma danskit naalakkersuisuisa akornanni isumaqatigiissuteqarnerit pillugit namminersornermut inatsimmi immikkut aalajangersagaqarpoq.

Nunaoil soorunami aamma inissisimaffeqarpoq, aammalu assersuutigalugu Nunaoil aatsitassarsiorluni misissuineq aamma piiiaanissamut akuersissutini aatsitassanut ikummatissanullu inatsit naapertorlugu tunniunneqarsimasuni akiliunneqarluni suleqataasutut taaneqartarpoq.



**Apeqquut 2-1:**

Apeqquummi 2-1-imi makkua allassimapput:

*”Piffissami 2014-2018-imi uuliamut tunngasumik ingerlatat aallunneqarnerat pingaanninnerusunngortinneqassasoq nunatsinni naalackersuinikkut ingerlatsisunit toqqarneqarsimasoq aningaasanut inatsimmut ataatsimiititaliap apeqqutaanut tunngatillugu Naalackersuisut Aningaasaqarnermut Akileraartarnermullu Ataatsimiititaliamut paasissutissiisutigaat. Piujuaannartitsinissamik tunngavilimmik nukissiuuteqarnerup qitiutinneqarneranit uuliamut gassimullu nuunnissamik Naalackersuisoqarfiup kissaateqarneranut suna tunngaviua?”*

**Akissut 2-1:**

Naalackersuisut nukissiamik imermillu pilersuineranut immikkoortumut pilersaarutimini 2017-imi novembarimeersumi nukissiornermut suliassaqaarfimmu takorluukkanik pilersaarutinillu arlalinnik aalajangersaasimasut, ilumoorpoq, ilanngullugu minnerunngitsumik 2030-imi pisortat nukissiamik pilersuineranni sapinngisamik annertunerpaamik ataavartumik nukissiuutinik kiisalu nukissiamik pilersuinermik nutaaliaasumik aallaaveqassasoq.

Taanna aammalu nukissiornermut immikkoortumut pilersaarummi anguniakkat allat, sulit atuutsinneqarput.

Nunarsuarmi tamarmi ikummatissat nunap iluaneersut ullormiit ullormut atorunnaarsinneqarsinnaanngitsut, nassuerutiginnartariaqarparput. Tamanna suliaqarnermi imaluunniit aningaasaqarnikkut ajornarpoq. World Energy Outlook 2017-imeersoq, Det Internationale Energiagentur-imit suliarineqartoq, naapertorlugu, uuliamik ujartuineq 2040-ip tungaanut annertusiartuinnartussaavoq.

Kalaallit Nunaat ilaatigut United States Geological Survey-mit missingersuinerit malillugit annertooujussuarnik uuliaqarfeqarpoq.

Taamaattumik Naalackersuisut naalackersuinikkut anguniagaraat, isumalluutit taakkua atorluarniarneqartariaqaraluartut. Kalaallit Nunaat nunatut allatuulli – nunat amerlanertigut uagutsitut qaffasitsigisunik avatangiisini piumasqaateqanngitsut - isumalluutiminik atorluanaanissamut pisinnaatitaavoq.

Kalaallit Nunaat nunatut uuliamik tunisassiorfiulissappat, nunatta taamaaliormi annertunerusumik aningaasaqarnikkut imminut napatissinnaanerulernissamut periarfissaqalissasoq, qularutissaanngilaq.

Taamaattumik nukissiornermut immikkoortumut pilersaarummi mingutsitsinngitsunik siunnerfeqarnerup aammalu Kalaallit Nunaanni uuliami isumalluutit atorluarneqarnissaasa imminnut akerleriinnerat takusinnaanngilarput. Marluk assigiinngitsut tassani pineqarput.

Kalaallit Nunaat aamma Paris-imi isumaqatigiisummi tunuarsimaarfeqarpoq, tassami nunat suliffissuaqarfusut pioreersut assigalugit aningaasaqarnikkut ineriartortitsinissamut pisinnaatitaaffeqarnissaq kissaatigineqarmat.

### **Apeqquut 2-2:**

Apeqquummi 2-2-imi Ataatsimiititaliaq aperivoq:

*”Taava nunami misissuinissamik Naalackersuisoqarfiup kissaateqarneranut suna tunngaviua, Nunaoilimmi imaani uuliasiorluni misissuineq kissaatigimmagu?”*

### **Akissut 2-2:**

Aallarniutigalugu erseqqissarusuppara, Nunaoil misissuinngimmat, kisianni misissuineq Inuusutissarsiornermut Nukissiuuteqarnermullu Naalackersuisoqarfiup, GEUS-ip aamma Nunaoil-ip akornanni suleqatigiinnikkut allartinneqarmat.

Misissuinermi Kalaallit Nunaat tamakkerlugu pisuussutinik naliliinermik nutaamik nutartigaasumillu peqalernissaq siunertaralugu, ilisimasat aamma paasissutissat nalunaarsukkat katersorneqarsimasut pioreersut tamarmik ilaatinneqarput, ilanngullugit paasissutissat nalunaarsukkat ingerlatseqatigiiffinit Kalaallit Nunaanni aatsitassarsiorluni misissuinissamut akuersissutinik peqarsimasunit katersorneqarsimasut.

Pisut imaapput, Kalaallit Nunaanni akuersissutit tamarluinnangajammik utertinneqarsimallutik, ilanngullugit sinerissap avataani akuersissutit, uuliasiorfiutiqatigiiffissuarnut nunani tamalaaneersunut, soorlu Shell aamma Chevron, tunniunneqartarsimasut.

Kalaallit Nunaanni misissuineq aallartiteqqissagaanni, ingerlatseqatigiiffiit siusinnerusukkat akuersissummik utertitsisimannngitsut pilerilersinniarsarinissaat pisariaqarpoq, tassami ingerlatseqatigiiffiit Kalaallit Nunaanniigunnaarsimasut utertinniarnissaat siunissami qanittumi ajornakusoortussaammat.

Naliliisoqarpoq siunissami Kalaallit Nunaanni uuliaqarsinnaaneramik ineriartortitsineq assigiinngitsunik sukkassusilinni pisariaqartoq.

Siunissami qanittumi aamma akunnattumik ungasissusilimmi nunami misissuinerup ineriartortinneqarnissaa piviusorsiorneruvoq, tassami tamatuma sularinissaa akikinnerummat taamatullu teknikkikkut pisariinnerulluni. Aamma nittarsaassineq uuliasiorfiutileqatigiiffinnut pingaartumik nunami suliartaartunut annertunerusumik sammitinneqartussaassaaq. Tassalu ingerlatseqatigiiffiit nutaat qanittumi Kalaallit Nunaannit qimagussimasuunngitsut, pilerilersinniarneqassapput.

GEUS, tassaasoq Danmarkimi suliassa qarfiup iluani immikkut ilisimasaqarnerpaaq, maannakkut Nuussuarmi nunap sannaani paasiniaaneq sularaa, tamannalu tunngavigalugu inassuteqaatit arlallit saqqummiunneqarput, aammalu inassuteqaatit taakkua Nuussuarmi suliassatut siunnersuutigineqartumut suliatigut, nunap sannaatigut tunngavissaapput. GEUS-ip nalunaarusiaata assilineri nassarpara, matumuunalu ataatsimiititaliamut tunniullugu.

Oqaatigeriikkattut taamatutaaq Nunaoil aamma GEUS peqatigalugit Kalaallit Nunaanni sinerissap avataani isumalluutiniq naliliineq nutartigaq pillugu ataatsimoorluni suliniut aallartipparput. Suliniuteqarneq taanna sivisunerusumik ingerlanneqartussaavoq, tassami sinerissap avataani periarfissaqarfinnik ineriartortitsineq, taamaattoqassappat ingerlatseqatigiiffiit ukiuni kingulliunerusuni Kalaallit Nunaanniikkunnaarsimasut peqataatillugit pisussaassammat. Taamatutaaq misissuineq akisunerujussuaq, teknikkikkut pisariunerusoq sivisunerusumillu ingerlanneqartussaaq, tassani pineqarpoq.

Taamaalillutik Naalakkersuisut naliliipput, uuliasiornermut suliassa qarfimmi periusissiaq nutaaq marlunnik ingerlaveqartillugu ingerlanneqartariaqaraluartoq – nunami siunissami qanittumi aammalu ungasinnerulaartumi – aammalu ungasinnerusumi ingerlaviusussaaq, sinerissap avataani periarfissaqarfiusunut tunngassuteqartoq.

Naalakkersuisut kontumi pingaarnermi 64.10.25-imi aningaasassat Nuussuarmi nunami suliassanut tunngasunut atorneqarnissaanik siunnersuuteqarnissaaq toqqarsimammassuk, tamanna tunngaviuvoq.

Allatut oqaatigalugu, sulianut tunngasutigut tunngavissaqarpoq, aammalu nunami misissuinissamorpiq periarfissat immikkuullarissumik ujartorneqarput, tamannalu nunarsuarmi nunami misissuinnermik suliassanut misissuinnermut aningaasaliissutinik annertoorujussuarnik atuisoqarnerani, takuneqarsinnaavoq.

Inussiarnersumik inuulluaqqusillunga

Aqqalu Jerimiassen